



Gemeinsam Änfert vum Här Henri Kox, Minister fir bannenzeg Sécherheet, vun der Madamm Sam Tanson, Justizministesch, an vum Här Claude Meisch, Minister fir Educatioun, Kanner a Jugend, op d'parlamentaresch Fro n° 6534 vum 22. Juli 2022 vum honorabelen Députéierten Fred Keup

Ad 1), Ad 2) an Ad 3),

Vu dass et sech bei dëse Faiten ëm eng lafend Affär handelt, spillt de "secret de l'instruction". Deemno décidéiert alleng de Ministère public iwwer d'Opportunitéit fir doriwwer öffentlëch ze kommunizéieren.

Ad 4)

All Bierger, deen Affer vun enger Strofdot ass oder berechtegt Hiweiser huet, dass en et kéint ginn, kann a soll sech un d'Police adresséieren. Heifir bitt d'Police och op hirer Internetsäit ënnert de Rubricken "Prévention" an "Aide aux victimes" an 3 Sproochen (FR / EN / DE) Preventiounsmoossnamen a Verhalensmesuren un.

Onofhängeg dovunner huet d'Police och d'Obligatioun, fir d'Erhale vun der öffentlecher Uerdnung an d'Sécherheet vum Bierger ze suergen. Dowéinst analyséiert d'Police kontinuéierlech all Virfäll um nationalen Territoire, fir séier adaptéiert Mesuren zum Schutz vun de Bierger an Institutiounen kënnen ze ergräifen.

D'Preventiounsservicer vun der Police bidden ausserdeem Couren am Beräich Gewaltpreventioun un. Hei gi vill Themen ugeschwat, wéi Mobbing, Cybermobbing, kierperlech a psychesch Gewalt, a wéi een sech ka verhalen, wann ee mat där Problematik konfrontéiert gëtt. Des Coure ginn op Demande vun de Schoule souwuel am Fondamental wei och am Secondaire ugebueden, dat am ganze Land.

Bei de Jugendhaiser ass d'Police Partner, fir sougenannt "guides d'intervention" auszeschaffen. Dës Guide renseignéieren doriwwer, wéi een a bestëmmte Fäll muss reagéieren (z.B. fir Educateuren, wéi si musse reagéieren, wa bei engem Jugendlechen de Verdacht besteet, dass en illegal Substanzen hält oder bei sech huet, wie muss an deem Fall a Kenntnis gesat ginn, etc.). Esou e Guide kann och am Beräich Gewalt opgestallt ginn.

An verschidde Stied schafft d'Police och mat 'Streetworker' zesummen.

D'Police ass och disponibel fir Couren am Beräich Gewaltpreventioun grad ewéi Drogepräventioun an der Grondausbildung vum Léierpersonal unzebidden, fir dem Schoulpersonal d'Rechter an d'Flichten an där Thematik méi no ze bréngen. Et géif dorëms goen, fir dat d'Léierpersonal eng Grondkenntnis kritt an dann och scho präventiv villem virgräife kann a Kanner op dës Theme preparéiere kann.

D'Police mécht och reegelméisseg am ganze Land souwuel zu Fouss wéi mam gezeechenten Auto Patrulle bei de Schoulen a Lycéeën fir Presenz ze markéieren. Dëst ass eng vun deene ville Missiounen, déi di respektiv Policeunitéiten am Kader vun hiren alldeegleche virgeschriwwenen Aufgaben ze erfëllen hunn.

Zousätzlech zu den Interventiounen vun der Police, setzt sech de Ministère de l'Éducation nationale, de l'Enfance et de la Jeunesse mat sengen Administratiounen fir d'Sécherheet vu Jonken an der Schoul an och ausserhalb vun der Schoul an. Souwuel um Niveau vun de (potentiellen) Victimë wéi vun (potentiellen) Auteuren, deenen hir Dote bal ëmmer op eng détresse psycho-sociale zeréckzeféiere sinn, bidden de CEPAS, de SNJ, de SCRIPT an den ONE souwuel individuell Hëllef wéi och allgemeng Sensibilisatiounscampagnen un.

Den ONE assuréiert d'Prise en charge vu Kanner, Jugendlecher a jonk Erwuessener bis 27 Joer, egal op se als Täter oder als Affer an engem Dossier optauchen. Si erhalen eng individuell Hëllef déi op hir Besoinen an dat wat si erlieft hunn, ageet. Den ONE ass souwuel a sengen regionalen Antennen, wéi iwwert eng telefonesch Helpline erreechbar.

Nieft der Police, bitt och d'Initiativ BEE SECURE zënter 2010 Sensibilisatioun an Informatioun iwwert e sécheren a responsablen Ëmgang mat Medien an Technologië fir Kanner, Jonker an hiert Ëmfeld (Elteren, Grousselteren, Éducatoren an Enseignanten) un.

D'Aktiounen vu BEE SECURE berouen op 3 Pilieren :

- Sensibilisatioun: Systematesch Formatiounen fir Kanner a Jonker déi dat kritescht Denken iwwer Praktiken an Inhalter am Netz fërderen, ënner anerem « Hate Speech » an aner Formen vu Gewalt déi online am Ëmlaf sinn. Den Haaptmessage, deen an deem Zesammenhang diffuséiert gëtt ass dee vum respektvollen Ëmgang mat aneren, sief et online oder offline. Och de Phenomen "Happy Slapping" gëtt bei dësen a weidere Sensibiliséierungsaktiounen thematiséiert.
- D'Signalement vun illegalen Inhalter: Iwwert BEE SECURE "Stoptline" kann all Bierger op eng anonym Aart a Weis illegal Inhalter (z.B. den Opruff zu Gewalt an Haass) mellen.
- Berodung: D'BEE SECURE "Helpline" ass e Kontaktpunkt fir all déi Leit déi wëllen anonym a vertraulech Hëllef a Berodung kréien, dëst a Bezuch op Theme ronderëm d'Sécherheet am Internet. Dorënner falen och Sujeten ewéi Haass a Gewalt um Internet.

Zousätzlech ass 2021 de neie Projet "S-Team: Setz dech an!" vu BEE SECURE lancéiert ginn, un deem schon 30 Ariichtungen deelhuele. Dëse Projet, deen an Zesammenaarbecht mam SNJ, dem SCRIPT an dem CEPAS an de Schoulen a Maison Relais ëmgesat gëtt, dréit derzou bäi Kanner a Jonker ze stäerken a sech fir e gewaltfräit Ëmfeld anzusetzen. Si ginn encouragéiert an der Schoul oder Maison Relais Aktivitéiten ze plangen an ëmzesetzen, déi sech géint Gewalt a fir e komerodschaftlecht Mateneen ausschwätzen.

Nieft den Interventiounen vu BEE SECURE, férdert och de CePAS Gewaltpräventioun an de Lycéeën. Dat psycho-sozio-edukatiivt Personal aus de Lycéeën, konkret d'SePAS an d'SSE, ass e wichtegen Acteur fir hëllef zu engem positive Schouklima bäizedroen an déi Jonk ze ënnerstëtzen am Umgang mat Aggressivitéit a Gewalt, sief et déi Jonk déi Gewalt ausüben oder och déi Jonk, déi Gewalt vun aneren erdroe mussen. Heibäi gëtt eng 'whole school' Approche benotzt, déi op der kollektiver Verantwortung vun der ganzer Schoulcommunitéit berout fir d'Gewalt an d'Belästegung präventiv anzegrenzen an se dann en charge ze huele wann et zu engem Gewaltausbroch oder eng Belästegung

kënnt. Präzis Prozedure wéi am Lycée mat Gewalt a Belästegung ëmgang gëtt a wéi se erméiglechen, Affer an Zeie vu Gewalt a Belästegung z'ënnerstëtzen an ze begleeden, wäerten am Hiersch 2022 op eng transparent Art a Weis alle Bedeelegte kommuniquéiert ginn an esou zu engem bessere Verständnis vun der Prise en charge bäidroen, an där de SePAS als éischt Ulafstell eng zentral Roll spilt.

Och een neie gesetzleche Kader dréit zur Bewältegung vu Phenomener wéi "Happy Slapping" bäi. Ufank dës Jores huet d'Regierung dräi Projets de loi déposiert, déi zesummen d'Jugendschutzgesetz von 1992 ersetze sollen. D'Gesetzesprojeten 7991 an 7994 féieren eng kloer Trennung zwësche Schutz- a Strofrecht an. Auteurs vun Infraktiounen ginn an Zukunft kloer fir hir Dote responsabiliséiert, kënnen awer och weiderhin op Hëllef am Kader vum neie Jugendschutzgesetz zeréckgräifen, wat hinnen hëlleft déi Problemer ze bewältegen déi d'Ursach vun hirem gesetzesbriechende Verhale sinn. De Projet de loi 7994 leet weiderhin ee grouse Fokus op Präventioun a féiert sougenannt "mesures préventives" a wat zum Ziel huet d'Offer am Beräich Präventioun weider auszubauen. Zousätzlech sollen d'Schutzmoosname fir Mannerjäreger, déi Affer oder Zeie vun enger Strofdot gi sinn, duerch de Gesetzesprojet 7992 verstärkt ginn. An dësem si verschidde geriichtlech Schutzmesurë virgesinn déi als Zil hunn, d'Sécherheet vum Mannerjäreger ze garantéieren an e virun eventuelle Repressalie wéinst senger Ausso ze schützen. Zum Beispill solle verschidde perséinlech Informatiounen vum Mannerjäreger, ënner anerem seng Adress, aus dem penalen Dossier kënnen ausgelooft ginn.

Lëtzebuerg, den 26. September 2022

Den Minister fir bannenzeg Sécherheet

(s.) Henri KOX